

dicitur *Te Deum*; et deinceps officium persolvitur ut in festo semiduplici usque ad nonam inclusive, qua terminata, finitur officium festi simplicis, et si festum duplex aut semiduplex non sequatur, vespere dicuntur feriales, sine ulla commemoratione præcedentis festi simplicis.

---



---

**Titulus IV.**

**236.**

## DE DOMINICIS.

Rub. De Dominica semper fit Officium in Dominicis Adventus, et in Dominicis a Septuagesima usque ad Dominicam in Albis inclusive, quocumque Festo duplici, vel semiduplici adveniente: quia tunc Festum transfertur, aut de eo fit commemoratio (ut in Rubrica de Translatione Festorum dicitur), nisi illud Festum sit de principali Titulo, vel Patrono alicujus Ecclesie vel loci, aut Dedicatione proprie Ecclesie: quia tunc de hujusmodi Festo fit tantum in Ecclesia, vel loco, cujus est Titulus, vel Patronus, vel Dedicatio, cum commemoratione Dominicæ; quibusdam Dominicis exceptis, ut dicitur in Rubrica de Commemorationibus. Id pariter servatur quoad alia Festa primæ classis, in prædictis Dominicis occurrentia. In aliis Dominicis per annum fit de Dominica, quando in eis non occurrit Festum duplex: quia tunc fit de Duplici cum commemoratione Dominicæ in utrisque Vesperis et Laudibus, et ad Matutinum legitur nona Lectio de Homilia Dominicæ, ut dicitur in Rubrica de Commemorationibus. Si Semiduplex eodem die occurrat, de eo fit commemoratio, ut pariter dicitur in Rubrica de commemorationibus.

2. De Dominica infra Octavas Nativitatis, Epiphaniæ, Ascensionis et Corporis Christi occurrenti, Officium fit sicut infra Octavam, et in Proprio de Tempore, cum commemoratione Octavæ, et sine Precibus et Suffragiis

Sanctorum. In Dominicis vero, quæ occurrunt infra alias Octavas, totum Officium fit de Dominica, ut in Psalterio et in Proprio de Tempore, cum commemoratione Octavæ, omissis etiam dictis Precibus et Suffragiis ut supra. De Dominica occurrente in die Octava fit commemoratio, sicut dictum est, quando in ea fit de Festo duplici, præterquam in die octava Epiphaniæ, in qua nihil fit de Dominica, quia ejus Officium ponitur in Sabbato præcedenti.

3. Positum est autem Officium sex Dominicarum post Epiphaniam, et viginti quatuor post Pentecosten, ut compleatur numerus triginta Dominicarum, quæ esse possunt ab Epiphania usque ad Septuagesimam, et a Pentecoste usque ad Adventum, ne ulla ex his Dominicis vacet, quin saltem de ea fiat commemoratio. Nam quæ aliquando supersunt post Epiphaniam ante Septuagesimam, ponuntur post XXIII a Pentecoste, hoc ordine:

4 Si Dominicæ post Pentecosten fuerint XXV, Dominica XXIV post Pentecosten erit quæ est VI post Epiphaniam. Si fuerint XXVI, Dominica XXIV erit quæ est V; et XXV quæ est VI. Si fuerint XXVII, Dominica XXIV erit quæ est IV; et XXV, quæ est V, et XXVI erit VI. Si fuerint XXVIII, Dominica XXIV erit III, et XXV erit IV, et XXVI erit V, et XXVII erit VI; et ultimo loco semper ponitur, quæ in ordine est XXIV post Pentecosten, etiamsi post Pentecosten aliquando non sint nisi XXIII Dominicæ. Tunc enim XXIV ponitur loco XXIII, et Officium XXIII ponitur in præcedenti Sabbato, quod non sit impeditum Festo novem Lectionum; alioquin in alia præcedenti die similiter non impedita, in qua fiat Officium de Feria, cum commemoratione festi simplicis, si occurrat; et in ea legantur tres Lectiones de Homilia Dominicæ, omissis Lectionibus Scripturæ illius Feriæ: et in Laudibus dicatur Antiphona ad Benedictus; et Oratio de Dominica XXIII. Quod si tota Hebdomada impedita sit festis IX Lectionum, etiam translatis, vel aliqua Octava, tunc in Sabbato

legatur IX Lectio de Homilia Dominicæ XXIII, et de ea fiat commemoratio in Laudibus tantum, cum Antiphona et Oratione propria.

5. Cum vero interdum contingat, ut Dominica tertia, vel quarta, vel quinta, vel sexta post Epiphaniam supersit, nec possit poni etiam post XXIII a Pentecoste, tunc de ea fit Officium in Sabbato ante Dominicam Septuagesimæ, ut dictum est supra, numero præcedenti.

6. De Dominica secunda post Epiphaniam, quando Septuagesima venerit immediate post Octavam Epiphaniæ, quomodo agendum sit Officium, habetur in propria Rubrica ante Dominicam primam post Epiphaniam.

7. Cum autem in Proprio de Tempore dicitur aliqua Dominica esse prima mensis, in qua primo ponitur initium libri de Scriptura cum sua historia, id est cum Responsoriis, animadvertendum est, eam dici primam Dominicam mensis, quæ venit in Kalendis illius mensis, vel est proximior Kalendis, hoc modo. Si Kalendæ venerint in II, et III et IV Feria, Dominica prima mensis erit quæ præcedit Kalendas, licet veniat in præcedenti mense: si autem Kalendæ venerint in V et VI Feria et in Sabbato; prima Dominica erit quæ sequitur post ipsas Kalendas, Dominica autem prima Adventus non sumitur ea, quæ est proximior Kalendis Decembris, sed Festo sancti Andreae, vel quæ venerit in ipso festo.

8. Officium Dominicæ fit semiduplex, et incipit a primis Vesperis in Sabbato: et habet totum Officium integrum usque ad Completorium Dominicæ inclusive, nisi cum aliquo concurrat, ut dicitur in Rubrica de Concurrentia Officii.

9. Ad Matutinum dicuntur tres Nocturni cum Psalmis, ut in Psalterio, et leguntur novem Lectiones, ut in Proprio de Tempore.

10. Quomodo autem sit ordinandum ejus Officium, insuper et de Lectionibus, Responsoriis et aliis, et quomodo initia librorum Scripturæ cum sua historia sint ponenda, habentur de singulis inferius propriæ Rubricæ.

Annotatur: 1. De dominicis majoribus semper fit officium juxta rubricas n. 1, quia in illis præcipua creationis et redemptionis nostræ mysteria recoluntur, ideoque majoris reverentiæ et cultus esse debent.

2. De Dominicis infra octavas nativitatis, epiphaniæ etc. ut supra in rubricis n. 2 dicitur, fit officium non ut in psalterio, sed sicut infra octavam, psalmos matutini et reliqua recitando de octava, ut officium maximæ celebritati Domini concordet; quæ ratio in dominicis infra alias octavas non ita invenitur, cum potius æquum sit, ut officium octavæ alicujus sancti cedat officio dominicali, quod Domini est.

3. Dominica, quæ est ordine 24 post pentecosten, semper ponenda est ultimo loco juxta rubricas n. 4, ob ejus evangelium, quod est de fine mundi; et idcirco legendum in fine anni ecclesiastici, qui ab adventu incipit, et ante adventum desinit.

4. Prima dominica in liturgia sub duplici respectu consideratur: 1º quoad lectiones in primo nocturno de s. Scriptura recitandas, et sic prima dominica mensis dicitur, ut explicatur supra in rubricis n. 7: et 2º quoad festum aliquod celebrandum in determinata dominica mensis; et sic dominicæ numerandæ sunt juxta computum civilem, non ecclesiasticum, ita ut in hoc casu prima Dominica mensis sit, quæ in kalendis seu prima die mensis occurrit, vel quæ illam sequitur; secunda, quæ ante se unam in eodem mense habuit, et sic deinceps (1). Confirmatur ex rubrica posita in festo septem dolorum, dominica tertia Septembris, ubi supponitur hoc festum posse occurrere in festo s. Matthæi Apostoli, quod fieri nequit, nisi dominicæ computu civili numerentur.

5. Officium dominicæ fit semiduplex juxta rubricas n. 8, quia, quamvis summa mysteria creationis, redemptionis, adventus Spiritus Sancti, in omnibus dominicis commemorantur, id tamen ritu minus solemniori fieri convenit, ritu duplici reservato propriis festivitibus paschæ, pentecostes, etc. quæ ritu duplici coluntur, ut dignum est.

(1) S. R. C. 11 Jul. 1739, n. 3941-4090; 23 Maji 1835, n. 4597-4746, 11; 24 Sept. 1842, n. 4802-4948.

Omnes dominicæ etiam majores, seu 1 et 2 classis, sub ritu tantum semiduplici celebrantur, exceptis solis dominicis paschæ, pentecostes, ss. Trinitatis et in albis, quæ ritu duplici fiunt: aliæ enim dominicæ, quæ dicuntur majores, seu 1 et 2 cl., ita vocantur quoad occurrenceam seu exclusionem aliorum festorum, non quoad ritum celebrandi, neque quoad concurrentiam cum aliis festis.

6. Officium dominicæ incipit a primis vesperis in sabbato, ut dicitur supra in rubricis n. 8, ita tamen, ut si officium duplex vel semiduplex non præcedat, dicantur psalmi feriales de sabbato.

---

DE DOMINICIS POST EPIPHANIAM ET POST PENTECOSTEN.

**237.** Dominicæ post epiphaniam ad minimum una, et ad summum sex esse possunt; et post pentecosten ad minimum 23, et ad summum 28. Omnes dominicæ quæ inter epiphaniam et septuagesimam, ac inter pentecosten et adventum intercedere queunt, possunt esse 30; ideoque officia 30 dominicarum posita sunt: fieri autem potest, ut 30 dominicæ in toto hoc tempore non numerentur, et eo casu faciendum est, quod præscribitur in rubricis hoc tit. n. 4 et 5, circa quod notanda sunt sequentia.

1. Quod si post pentecosten usque ad adventum tantum 23 dominicæ intercedant, tunc dominica vigesima quarta ponenda est loco dominicæ vigesimæ tertię, et officium dominicæ vigesimæ tertię in sabbato aut alia præcedente die, ut infra dicitur: et si aliqua ex dominicis post epiphaniam (præter dominicam secundam post epiphaniam, de qua vide tom. III, n. 11), nec in proprio loco, nec post 23<sup>am</sup> dominicam a pentecoste poni possit; tunc in sabbato ante septuagesimam vel in alia præcedente feria illius hebdomadæ poni debet officium illius dominicæ, quæ prima post epiphaniam impeditur, reliquis, si quæ supersint, translatis post dominicam 23<sup>am</sup> a pentecoste, ut dicitur in rubricis n. 4.

2. Officium dominicæ impeditæ post epiphaniam ponendum

est in sabbato ante septuagesimam, et impeditæ post pentecosten in sabbato ante dominicam 24<sup>am</sup>, quæ hoc anno est 23<sup>a</sup> et ultima post pentecosten, si in sabbato fiat de eo, aut occurrat festum simplex, de quo in casu fit tantum commemoratio in laudibus et missa absque ejus lectione; et si officium duplex aut semiduplex non præcesserit, vesperæ antecedentes sunt feriales cum commemoratione festi simplicis juxta rubricas tit. XI, n. 10. Si autem sabbatum sit impeditum officio etiam translato 9 lectionum sive duplici aut semiduplici, sive de die infra octavam aliquam; tunc officium dominicæ impeditæ ponitur in alia ejusdem hebdomadæ præcedente feria, similiter non impedita, quæ tamen, si plures non impeditæ in eadem hebdomada occurrant, omnium proxima ipsi sabbato esse debet (1).

Not. in casu, quo de dominica anticipata post pentecosten fit in die sabbatum præcedente, in feriis præcedentibus et sequentibus nulla fit mutatio lectionum s. Scripturæ occurrentis, sed omnes leguntur prout in breviario disponuntur, translato vel anticipato initio, quod occurrit in feria, in qua fit de dominica. Sed si fiat de dominica anticipata post epiphaniam in feria sabbatum præcedente; tunc post diem, in qua officium dominicæ anticipatæ factum est, legitur in sequentibus diebus de epistolis s. Pauli assignatis dominicæ anticipatæ et sequentibus feriis, omissis lectionibus, quæ sunt assignatæ præcedenti hebdomadæ (2): ita ut prima die post factum officium dominicæ anticipatæ ponatur initium dominicæ anticipatæ, et in sequentibus feriis, 4<sup>a</sup>, 5<sup>a</sup>, 6<sup>a</sup>, et sabbato, quæ supersunt, legantur lectiones assignatæ hebdomadæ dominicæ anticipatæ, non quidem quæ assignatæ sunt feriæ 2<sup>a</sup> et 3<sup>a</sup>, sed quæ occurrunt in respectivis diebus, in quibus leguntur. Si aliqua infra hebdomadam occurrant initia; tunc hæc legi debent, licet eorundem plura simul poni oporteat, etiam in die, in quo ponitur ipsum initium domi-

(1) Cavalieri tom. 2, dec. 120, n. 8.

(2) Rub. tit. XXVI, n. 8.

nicæ anticipatæ (1). Quod si cuncta initia poni non possint; eo casu ea quæ poni nequeunt, hoc anno omittuntur (2).

Si in feria, in qua fit de dominica anticipata, initium alicujus epistolæ s. Pauli occurrat; censet Cavalieri (3) illud initium in feriam præcedentem, si fieri possit, esse anticipandum: verum cum rubrica tit. XXVI, n. 8, generaliter statuatur, *omissis aliis quæ sunt assignatæ præcedenti hebdomadæ*; et cum officium hebdomadæ anticipatæ incipiat in feria, in qua officium dominicæ anticipatur, licet ejus lectiones primi nocturni tantum ponantur in feria sequente, quia officium feriale tantum tres lectiones homiliæ admittit; sequitur lectiones feriæ, in qua officium dominicæ anticipatur, simpliciter esse omittendas, sive sint initium sive continuatio alicujus epistolæ, prout omittenda sunt initia quæ occurrunt in feriis sequentibus, et quæ poni nequeunt ob advenientem dominicam septuagesimæ per cessationem temporis.

3. In illo die, in quem officium dominicæ transfertur, si officio 9 lectionum occurrente aut translato non sit impeditus, debet fieri officium feriale ut in psalterio, cum precibus et suffragiis etiam de cruce, cum tribus lectionibus et tribus responsoriis, sine *Te Deum*, et absque commemoratione illius dominicæ translatae in primis et secundis vesperis: missa ut in aliis feriis similiter dicitur de dominica translata sine *Gloria* et *Credo*, cum præfatione communi et *Benedicamus Domino* in fine, et si placuerit cum pluribus quam tribus orationibus. In feriali officio hæc tamen sunt mutanda, scilicet: 1º legitur evangelium dominicæ cum ejus homilia, dicendo tamen tria responsoria feriæ currentis, nisi forte responsoria primi nocturni dominicarum illius mensis aut temporis hoc anno nondum sint recitata; tunc enim responsoria ex primo nocturno dominicæ anticipatæ sunt desu-

(1) S. R. C. 4 Sept. 1745, n. 4026-4175, 6.

(2) Cavalieri tom. 2, dec. 120, n. 43-46.

(3) Loco cit. n. 32 et seq.

menda (1). 2º In laudibus de feria, dicitur antiphona ad *Benedictus* et oratio de dominica translata, versus vero post hymnum de feria. Oratio dominicæ translatae dicitur etiam in aliis horis.

4. Si tota hebdomada impedita sit officiis 9 lectionum, etiam translatis, aut aliqua octava; tunc in sabbato legitur 9ª lectio homiliæ dominicæ, et de ea fit commemoratio non in vesperis, sed in laudibus cum antiphona et oratione de dominica et versu de sabbato, atque in missa, in cujus fine legitur evangelium dominicæ: idque fieri debet, licet festum duplex 1 cl. in sabbato occurrat (2). Si in sabbato, in quo fit commemoratio dominicæ anticipatæ, occurrat officium non habens lectiones primi nocturni proprias vel de communi assignatas; tunc in casu dominicæ anticipatæ post pentecosten in primo nocturno leguntur lectiones in breviario sabbato assignatæ; in casu autem dominicæ anticipatæ post epiphaniam in primo nocturno legendæ sunt lectiones de dominica anticipata, dummodo initium alterius epistolæ s. Pauli in sabbato non occurrat, quo casu initium dominicæ anticipatæ omittitur, et illud sabbati legitur (3). Si in sabbato officium fiat de die infra octavam aliquam cum 9ª lectione et commemoratione dominicæ anticipatæ; missa celebranda est prout in rubricis generalibus missalis tit. III n. 2 disponitur, scilicet de dominica anticipata cum commemoratione octavæ, tertia oratione, quæ secundo loco infra octavam assignatur, et cum præfatione communi, vel de octava, si propriam habeat (4). Not. in sabbato occurrente officio duplici, semiduplici vel die octava, non esse cantandas duas missas conventuales, sicut nec in dominicis occurrente officio duplici, duæ cantari debent (5).

(1) Rub. tit. XXVII, n. 7.

(2) S. R. C. 4 Sept. 1745, n. 4026-4175, 6.

(3) S. R. C. 4 Sept. 1773, n. 4217-4366, 4; 28 Mart. 1775, n. 4229-4378, 10.

(4) Guyetus lib. 4, c. 2, q. 4, et Cavalieri tom. 2, dec. 120, n. 19 et seq.

(5) Cavalieri ibidem n. 22.

Not. 1<sup>o</sup> indulta semel vel pluries in singulis hebdomadis vel mensibus recitandi officia votiva, v. g. de ss. Sacramento, de conceptione B. M. V. vel de sanctis, in diebus non impeditis festo duplici aut semiduplici, non habere locum in illa feria, in qua officium dominicæ juxta rubricas est reponendum, etiamsi in indulto nulla hujus feriæ specialis facta sit mentio (1).

Not. 2<sup>o</sup> quoad festa ad libitum, ut s. Canuti 19 Jan. et s. Juliani 28 Jan. Statuit S. R. C. 20 Sept. 1681 (2) : « Potest » officium s. Canuti M. ad libitum recitari die 19 Jan. et eo » casu sabbato ante dominicam septuagesimæ legenda est » in officio nona lectio de homilia dominicæ etc. » et 4 Ap. 1705 (3) : « Esse omittenda officia sanctorum ad libitum. » Quæ decreta primo intuitu contraria apparent, ita ut prius per posterius revocari diceretur : revera tamen contraria non sunt, cum, ut ex petitionibus utriusque clare constat, agant de diversis casibus, prius scilicet de officio ad libitum occurrente in aliqua feria ante sabbatum, ut in indice decretorum ad vocem s. Canuti explicatur; et posterius de officio ad libitum in ipso sabbato occurrente, hoc enim agit de die, in qua officium ad libitum vel est omittendum, vel recitandum cum dominicæ commemoratione, quæ, ut supra ad 4 dictum est, in solo sabbato est facienda. Unde 1<sup>o</sup> juxta posterius decretum, festum ad libitum in sabbato ante septuagesimam occurrens est omittendum, et ejus loco ponendum officium dominicæ anticipatæ, nisi, ut limitat Cavalieri (4), supersit aliud festum translatum, quia tunc omisso festo ad libitum, officium dominicæ per positionem festi translati æque impediretur : et 2<sup>o</sup> juxta prius decretum festum ad libitum in aliqua die ejusdem hebdomadæ ante sabbatum occurrens, licet nulla alia dies infra hebdomadam, non impedita officio novem lectionum, occurrat, equidem recitari

(1) Dec. gen. 20 Mart. 1706, n. 3592-3741, 1.

(2) N. 2817-2966.

(3) N. 3569-3718, 5.

(4) Tom. 2, dec. 121, n. 4.

potest, faciendo commemorationem dominicæ anticipatæ in sabbato ante septuagesimam, ut supra ad 4 dictum est : cum tamen decretum in casu statuat, officium recitari posse, non autem debere; videtur etiam sequi, officium ab libitum omitti posse, ut ejus loco ponatur officium dominicæ anticipatæ.

---

### Titulus V.

#### 238.

#### DE FERIIS.

*Rub. Officium feriale, hoc est, simplex de Tempore occurrenti, prout in Psalterio et Proprio de Tempore habetur, fit semper in Feriis Adventus. Quadragesimæ, Quatuor Temporum, Vigiliarum, et in Feria secunda Rogationum, quando infra hebdomadam non occurrit Festum duplex, vel semiduplex, vel de Octava : quia tunc de hujusmodi Feriis fit commemoratio, ut dicitur in Rubrica de Commemorationibus. Si vero in eis occurrat Festum simplex, de eo fit tantum commemoratio. Item per annum fit Officium de Feria illis diebus, quibus infra Hebdomadam in Calendario non ponitur aliquod Festum duplex, semiduplex, vel simplex, et non occurrit aliqua Octava, vel Officium sanctæ Mariæ in Sabbato, vel aliquod Festum solemne, aut consuetum in aliqua Ecclesia celebrari, quamvis in Calendario hujus Breviarii non sit descriptum.*

2. *Officium Feriæ in Adventu, Quadragesima, Quatuor Temporibus, Vigiliis et prima die Rogationum, incipit a Matutino : in aliis vero Feriis per annum, inde fit de Feria, ubi desinit Officium præcedentis diei, ita ut si præcedenti die fuerit Duplex, vel Semiduplex, Officium Feriæ incipiat sequenti die a Matutino : si præcedenti die fuerit Festum simplex, de Feria fiat a Vesperis*

*illius præcedentis diei inclusive. Similiter et quando in Feria IV et VI Quatuor Temporum Septembris, et in Feria IV Cinerum, ac in Vigiliis occurrit aliquod Festum simplex, de quo fieri debet commemoratio, tunc præcedenti die (nisi fuerit Festum novem Lectionum) in Vesperis fit de Feria, ut in Psalterio, sine Precibus, cum Oratione Dominicæ præcedentis, et cum commemoratione Festi trium Lectionum in sequenti Feria occurrentis, ut dicitur infra in Rubrica de Concurrentia. Terminatur autem officium de Feria, subsequente duplici vel semiduplici, ad Nonam: subsequente vero simplici, de quo fieri debeat Officium, ad Capitulum Vesperarum, quia inde fit de Festo simplici absque ulla deinceps commemoratione Feriæ.*

3. *Ad Matutinum dicitur unum tantum Nocturnum cum XII Psalmis, secundum ordinem Feriarum in Psalterio, et tribus Lectionibus, ut in Proprio de Tempore.*

4. *Excipiuntur ab hoc ordinario Officii ferialis tres Feriæ majores Hebdomadæ sanctæ, et Feriæ Octavarum Paschæ et Pentecostes, in quibus fit Officium, ut in propriis locis ponitur.*

5. *Quomodo ordinandum sit Officium de Feria ad Matutinum et alias Horas, item de Lectionibus et Responsoriis, et quando dicendæ sint Preces feriales, ac de aliis, quæ ad officium Feriæ pertinent, habentur inferius de singulis propriæ Rubricæ.*

In dominica et feriis distribuitur recitatio totius psalterii; ita ut in qualibet hebdomada totum recitetur psalterium: quæ distributio relationem aliquam habet ad creationis opera sex dierum, vel etiam ad mysteria, quibus feriæ dedicatæ sunt. Quapropter tam feriæ quam dominicæ officium Domini dicitur, non tantum quatenus immediate cedit in honorem Dei, et sic ab officio sanctorum distinguitur; sed etiam quatenus specialem aliquam relationem habet ad

Deum creatorem, redemptorem etc. Officium tamen tam dominicæ quam feriæ festis sanctorum cedit, quia, quamvis officium dominicæ et feriæ domini dicatur, et sub hoc respectu officii sanctorum præferendum sit, ratio tamen quare officium dominicæ et feriæ Domini dicitur, specialiter tantum invenitur in quibusdam dominicis et feriis, ut paschæ, pentecostes etc. quæque etiam nulli festo sanctorum cedunt; in aliis autem dominicis et feriis tantum generaliter invenitur; cum tamen festum sancti hoc die, quo colitur, specialem cultus rationem præ se ferat. Præterea quodlibet officium sanctorum etiam Domini dici debet; siquidem laudamus Deum in sanctis suis.

---



---

Titulus VI.

*Rub. De Vigilia fit Officium in omnibus Vigiliis per annum quæ jejuntur, ubi in Calendario annotatur hæc vox Vigilia: nisi in die Vigiliæ occurrat Festum novem Lectionum, vel Octava; tunc enim in Officio novem Lectionum legitur nona Lectio de Homilia Vigiliæ, et fit commemoratio de ea ad Laudes tantum, cum Antiphona ad Benedictus, et versu Feriæ occurrentis de Psalterio, et Oratione Vigiliæ; præterquam in illis Festis majoribus, quæ inferius excipiuntur.*

2. *Si Vigilia occurrat in Dominica, de ea fit Officium in Sabbato, quod non sit impeditum Officio novem Lectionum: quia tunc de Vigilia fit tantum commemoratio, et Epiphaniæ Domini; quæ si venerint in Dominica, fit de illis, ut in propriis Rubricis dicitur. Si autem in Vigilia occurrat Festum solemne alicujus loci, vel ex*